

Date – 18/05/2024

Time - 7:30 -7:40Hrs

REGIONAL NEWS BULLETIN

HEADLINES (MORNING)

1. Kum dang nena khaikhinin kumin tun ang hun thlengin Mizorama ruahtui a tla tlem.
2. Aizawl Smart City Limited hnuaiia Bazarpuia ‘Aizawl City Centre’ sak mek chu zaa 30 zawh a ni tawh.
3. External Affairs Ministry chuan Chababar lawngchawlhna chuan khawmual kara awm Central Asia ramte inkalpawhna a siam dawn a ti.
4. Sawrkar laipui chuan Cambodia leh Sout East Asia ramahte hna zawnga kal tumte chu agent lemte laka fimkhur turin a chah.



RAINFALL THIS YEAR

Kum dang nena khaikhinin kuminah Mizorama ruahtui a tla tlem.

Akashvani Corr in Aizawl Meteorological Centre Director Sudheer Kumar Dwivedi a kawmnaah he thu hi a sawi a, Pu Dwivedi-a chuan Sorkar khawchin thlirtuin a chhinchhiah dan chuan kum dang January atanga tun thla thlenga ruahtui tla thin aiin kumina ruahtui tla hi zaa 45-in a tlem zawk a ti a. Kum dang hetih huna ruahtui tla hi a tlangpuiin Milimeter 370.40 a nih thin lain kuminah chuan milimeter 203.10 chauh a tla a ni a ti.

Aizawl district bikah chuan kum dangah a tlangpuiin milimeter 445.60 a tla thin a, kuminah chuan January ni 1 atang tun thla thlengin milimeter 376.40 chauh a tla a. Champhai District-ah ruahtui a tla tlem zual bik hle a; kum danga milimeter 305.20 vel tla thin kha kuminah chuan milimeter 48.8 chauh a tla a ni.



CM MEETS MC AUTHORITY

Chief Minister Pu Lalduhoma’n nimin khan a office-ah Aizawl Millennium Centre thuneitute kawmin Millennium Centre enkawl dan leh sak chhunzawm chungchangte a sawipui.

Chief Minister hian Millenium Centre-a vantlang inthiarna man chawi lova kalpui theih a nih leh nih loh te, dawr neitute leh a luah chhawngtute inkarah luah man mumal zawk leh inremna dan tha zawk a duan theih em tih te chu Governing Body-in lo ngaihtuah se tha a tih thu a lo hrih a. Millenium Centre inenkawltha taka a kal zel chu lawmawm a tih thu a sawi bawk.

He hunah hian Millenium Centre Authority Manager, Pu R. Lalnunpuia chuan Millenium Centre sak a nih dan kimchang leh tuna an dinhmun te, Chief

Secretary kaihhruai Millenium Centre Governing Body-in North Block Building chung lama sak belh tura ruahmanna a lo duan tawh te a sawifiah a. Millenium Centre hi Structural Safety Certificate nei, a original design anga chhawng 4 la sak belh theiha him a ni a. Tun dinhmunah chhawng khat, Food Court tur bik sak belh dan ngaihtuah phawt ni se tiin Governing Body chuan ruahmanna a nei a; an ruahmanna hi Chief Minister hnenah hian an thlen a ni.

A sakna sum hi a tir atangin Bank Loan hman a ni a, sawrkar sum ruahman a ni lo. Loan hi an rul zo vek tawh a. Tuna sak zawm lehna tur pawh hi sawrkar sum hmang lova kalpui leh tur a ni.

Tunah hian Millenium Centre-ah hian dawr 342 a awm mek a, an zinga 4 hi hun bi neia luahtir a ni a; a dang te chu a leitute hnenah kum 91 chhung atan pek a ni a. Thawktu nghet 8 an awm mek a, rukruk ching lak inven nan High Definition CCTV 66 an vuah a ni.

<><><>

NGOs MET CM

Hnahtial District Consultative Committee (DCC), District Level Review Committee (DLRC) leh District Level Security Committee (DLSC) chu nimin khan Rallangtlang DC Meeting Hall-ah DCC Chairman, District Bawrhsap ni bawh Pu Chuahhuna kaihhruiin an thukhawm a a. District Bawrhsap chuan Hnahtial District tana Annual Credit Plan 2024-2025 chu lawm takin a tlangzarh nghal bawh.

Meeting in a tarlan danin mipui hamthatna tura Sorkar laipui duan Social Security Scheme hrang hrang- PMJJBY, PMSBY leh APY ah te Hnahtial District chhunga bank awmte dinhmun en ho a ni a, tun dinhmunah SBI ah PMJJBY hnuaiah 2878 an inziaklut a, PMSBY ah 3160 in ziaklutin APY ah 5293 an in ziak. MRB ah PMJJBY inziaklut mi 4480 an awm a, PMSBY ah mi 4017 awmin APY ah mi 5106 an bawm. MCAB ah mi 818 in PMJJBY ah an in ziaklut a, PMSBY ah mi 298 inziaklut in APY ah mi 684 an inziaklut a ni. Loan rul tha lo chungchang pawh sawi ho a ni a, quarter hmasa nen tehkhinin a tlakhniam hret hret thu tarlan a ni.

Banking leh kaihhnawh pawimawh mipui hnena hrilhhriatna (Financial Literacy Camps) chu a tlem berah thlatin vawikhat tal neih a tul thu tarlan niin bank a thawh te chu tang leh zual tura hrilh an ni a, Hnahtial District a bank branch hrang hrang hnuaia savings account leh current accounts te chu March 2025 hmaa digitalized vek tawh tur a ni tiin tun dinhmunah zaa 48 chiah digitalized a nih thu tarlan a ni bawh.

He thutkhawmah hian Line Department hrang hrang hotute bakah Chief Manager, LBO Lunglei, NABARD Lunglei, Lead District Office, RBI, Aizawl, Regional Manager MRB, RBO, Lunglei te bakah Hnahtial district chhunga bank branch hrang hrang aiawhte an tel a ni.

<><><>

23 ARRESTED IN COMPENSATION CASE

Prevention of Corruption Act, Special Judge Pu HTC Lalrinchhana'n India leh Bangladesh ramri hungna tur atana sorkarin mimal ram a laksakah Land Settlement Certificate, LSC lem hmanga zangdawmna la mi 23 te thiamloh a chantir.

Kum 2007 khan ramri hungna siam hna hi kalpui niin LSC lem 35 hmangin zangnadawmna la an awm tih hriatchhuah a ni a. He thubuai hi Central Bureau of Investigation, CBI chuan chhuiin hetih hun laia CADC Revenue Officer Ranga Mohan Chakma chu LSC lem pechhuak tu berah puh a ni a. CADC hnuaia Surveyor pahnihte nen inthuralin ram lak ngai tur hming list pawh diklo taka siama puh an ni a. He thubuaia LSC pekchhuah ho hi sorkar pisa chawlhni a pek vek ni a tarlan a ni bawh.

He thubuaia thiamloh chantir te hi bail a chhuah lailawh anlo nih tawhna chu sut a ni a. Lung In ah khung nghal turin court chuan an chungthu a rel a ni.

<><><>

PROJECT MONITORING COMT

Mizoram Sorkar hmasawna ruhrel endik tura din, Mizoram State Project Monitoring Committee (MSPMC) chuan Aizawl Smart City Limited hnuai 'Aizawl City Centre' leh Commerce & Industries Department hnuai 'Aizawl City Centre Annex' hmalakna kal mekte nimin khan an endik a

Vice Chairman, Pu R. Lal Rinawma hovin endiktute hi an kal a, Pu Lal Rinawma chuan building sak meka rawtna a neih te sawiin a building enkawl leh zel dan tur -Operating and Management chu a pawimawh thu sawiin heng hmalakna awm mekte zawh fel a nih hun a sum deh chhuah anih theih dan tur te sawi ho nghal a ni.

Aizawl City Centre hi tun hma a New Market Main building awm thinna hmuna sak niin UD&PA department hnuai Aizawl Smart City Limited enkawl a ni a. He project zawh fel nan hian cheng vbc 41.59, Smart City Mission atanga fund dawn a ni a, nikum January thla atang khan hna hi tan a ni. Tun dinhmunah hian hna zaa 38 vel zawh fel tawh a ni.

Aizawl City Centre Annex hi tun hma a Foreign Lane building awm thinna a sak niin Commerce & Industries Department hnuai enkawl a ni a. He project zawh fel nan hian NEDP atangin cheng nuai 3641.59 a fund hmuh a ni a, he hna hi June 2020 atanga tan a ni a, tun dinhmunah hna hi zaa 70 vel zawh fel tawh a ni.

Heng project pahnihte Contractor leh Consultancy Firm atan hian Lushai Engineers, Ramhlun South te chu hman an ni.

<><><>

MENTAL HEALTH CAMP

Mizoram State Legal Services buatsaihin nimin khan Aizawla TNT, Muanna vengah Mental Health Camp neih a ni a.

Mizoram University –a School of Medical & Paramedical Sciences, Clinical Psychology Deptt. chuan Mental Health Assessment Camp an nei a, rilru lam harsatna neite tan Counselling pein a mamawhte Disability Certificate neih theih nan test chi hrang hrang an tihpui a ni.

MZU atang hian Teaching Faculty 4 leh M.Phil leh M.Sc.Clinical Psychology Zirlai mi 20 ten assessment an kalpui.

Tlai lamah , Gauhati High Court Chief Justice, Justice Vijay Bishnoi ah he hun hi a hmanpui a, Justice Michael Zothankhuma, bakah Padma Shri Dr. Sangthankima, Founder Chairman, TNT te chuan thu an sawi a ni.

TNT, Aizawl-ah hian thawktu mi 96 leh enkawl lai mi 1714 awmin an vaiin mi 1810 an awm mek a ni.

<><><>

EXTERNAL AFFAIRS MINISTRY

External Affairs Ministry chuan Chababar lawngchawlhna chuan khawmual kara awm Central Asia ramte inkalpawhna a siam dawn a ti. Thuchhuah a siamah External Affairs Ministry chuan Chababar port chu Afghanistan leh tuipuiin a pawh ve loh central Asia ramte tana inkalpawhna a ngaihpaawimawh zia ti langtu a ni a ti a. India leh Iran ten hun rei tak daih tur inremna an siam chu hlawhtlinna ropui tak anih thu External Affairs thupuangtu Randhir Jaiswal chuan chanchinbumite a hrilh a. He port kaltlang hian India chuan Afghanistan ah mipuite chhawmdawlina tam tak a

thawnluh theih phah a ti a. Hei hi US pawhin a hriatthiam thu sawiin helai chhehvel ramte tan Chabaha port hi a pawimawh em em a ni ati.



ADVISORY BY EAM

Sawrkar laipui chuan Cambodia leh Sout East Asia ramahte hna zawnga kal tumte chu agent lemte laka fimkhur turin a chah. External Affairs Ministry hnuai Cambodia leh Laos-a Indian embassy te chuan thuchhuah siamin agent lem tam tak an awm a, heng ho hian India ah pawh agent an neih thu sawiin company lem hmanga mipuite thlemin hnathawk turin an bumchhuak thin a ti a. Cambodia leh a chhehvela hna zawng reng reng chuan External Affairs Ministry pawmpui agent te kaltlang chauha hna zawng turin a chah a ni.

